

SCRIPT OF MORNING GOJRI NEWS BULLETIN 29JAN 2025 1015HRS

مارننگ گوجری نیوز بولٹین 29 جنوری 2025

ISRO LAUNCH

اسرو نے آندھرا پردیش مانہ قائم شری ہری کوٹا غا ستیش دھون خلائی مرکز تیں اج سویرے ۶ بجے ۳۲ منٹ ور جی ایس ایل وی ایف ۵۱ راکٹ غے زریعے این وی ایس ۲۰ سیٹلائٹ نانہ کامیابی غے نال خلاء مانہ داغ دتو ہے یاہ سیٹلائٹ جیو سٹیشنری تبدیلی محور غے اندر کامیابی نال داخل کردتی گئی ہے تے اس کامیابی نال ستیش دھون خلائی مرکز تیں خلاء مانہ داغی جان آلی سیٹلائٹ غی تعداد ۰۰۱ ہوگئی جہیڑی جے اس خلائی مرکز غی ایک بہت بڑی کامیابی ہے۔

LG SINHA AWARDS

لیفٹیننٹ گورنر منوج سنہا نے جموں مانہ مہاراجہ ہری سنگھ امن تے بھائی چارہ انعام حاصل کرن آلا افراد نانہ مبارکباد پیش کی۔یوہ اعزاز عوامی فلاح و بہبود وستے کام کرچکا ۳ افراد نانہ اُن غی وفات تیں بعد اُن غے نام کیو گیو ہے یوہ اعزاز پنڈت پریم ناتھ ڈوگرا، پنڈت گرداری لال ڈوگرہ تے دویندر سنگھ رانا غی خدمات غا نتیجہ مانہ اُن غے نام کیو گیو ہے۔ اپنا خطاب مانہ لیفٹیننٹ گورنر منوج سنہا نے مہاراجہ ہری سنگھ غ اترقیاتی اقدامات ور روشنی پائی تے سماج غے اندر خواتین نانہ باختیار بنان تعلیم نانہ عام کرن تے دیگر سماجی فلاح و بہبود غا کال کاج ور وی تفصیلی روشنی پائی گئی۔ موصوف نے سماج غا ہر طبقہ غا افراد غی وکست بھارت غے تنیں ذمہ داریاں نانہ وی اُجاگر کیو۔ اس موقعہ ور ایل جی موصوف نانہ وی منصوبہ بندی تے دیگر اصلاحات وستے مہاراجہ ہری سنگھ انعام نال نوازیو گیو۔

DY CM CONCLAVE

نائب وزیر اعلیٰ سریندر چوہدری نے جموں کشمیر سرکار غا تمام بڑا اقدامات ور روشنی پائی تے اس ضمن مانہ ہویا پروگرام بدلتا جموں کشمیر غے دوران بولتاں مانہ موصوف نے کہیو کہ سرکار نے کئی بڑا اقدامات کیا ہیں تاکہ جموں کشمیر بھارت غو سب تیں زیادہ ترقی یافتہ علاقو بن غے سامنت آوے۔ اس ضمن مانہ چلایا گیا کئی فلاحی پروگراماں تیں عوام فائدو حاصل کر رہی ہے۔ وزیر موصوف نے مقامی صنعتاں غی ترقی تیں علاوہ سڑک رابطاں غی بہتری اور ۴ لین پیر پنچال سڑک رابطاں اور ریلوے رابطاں غی توسیع ور زور پایو نائب وزیر اعلیٰ نے مزید کہیو کہ جموں کشمیر غا خصوصی درجہ تے ریاست غی بھالی وستے مرکز غا وعدہ ور کوشش لگاتار جاری ہیں۔

RANA JUAL

جموں کشمیر غے اندر قبائلی بردریاں غی فلاح وبہبود خاطر ایک برو قدم چاتاں مانہ قبائلی امور غا وزیر جاوید رانا نے مرکزی وزیر جول اورم نال نوی دلی مانہ ملاقات کر غے قبائلی افراد غی مجموعی ترقی ور تبادلہ خیال کیو ہے اس دوران مذکورہ افراد غی سماجی تے معاشی مشکلات تیں علاوہ تعلیم تے طبی سہولیات ور گل بات کی گئی تے قبائلی آبادی غی پائیدار ترقی خاطر موثر اقدامات ور وی تبادلہ خیال کیو گیو۔ اس دوران پیش کی گئی تجاویز مانہ ۵۱ اکلویا ماڈل رہائشی اسکول ۵۰ ٹیلی ادویات مرکز ایک قبائلی اسمارٹ گراں تے راجوری پونچھ غے اندر اکو سیاحت پروجیکٹ شامل ہیں۔ اس دوران قبائلی امور گا وزیر جاوید رانا نانہ ان فلاحی پروجیکٹاں ور مرکز غا بھرپور تعاون غو یقین دوايو گیو ہے۔

SAKEENA HEALTH CARE

جموں کشمیر غے اندر طبی محکمہ غے اندر مثبت تبدیلی لیاں خاطر صحت تے طبی تعلیم غی وزیر سکینہ اٹو نے طبی اداراں غے اندر زرائع تے سہولیات غا بادا خاطر زور پایو ہے بدلتا جموں کشمیر کنکلیو غے دوران بولتاں مانہ موصوفہ نے وزیر اعلیٰ عمر عبداللہ غی قیادت مانہ طبی شعبہ غی بہتری خاطر چایا گیا اقدامات غو ذکر کیو جس مانہ دور دراز علاقاں غے اندر ۳ سو ڈاکٹر اں غی تعیناتی سب ضلع ہسپتال غے اندر ڈائلسز غی سہولیات وغیرہ شامل ہیں۔ موصوفہ نے سرکار غی طرفوں عوام نال کیا گیا وعداں غو ذکر کرتا مانہ کہیو کہ سرکار اپنا تمام تر وعداں غی پابند ہے تے لگاتار فلاحی کام کیا جارہیا ہیں۔

DGP VISIT

جموں کشمیر پولیس غا ڈائریکٹر جنرل نلین پرہیات نے اے ڈی جی پی آنند جین تے کئی دیگر اعلیٰ حکام گے ہمراہ ریاسی تے رام بن علاقہ مانہ فوج غی تمام تر تیاریاں گو جائیزو لیو۔ اس دوران فوج غی طرفوں علاقہ غے اندر حفاظتی انتظامات گو جائیزو لین تیں علاوہ ڈی۔ جی۔ پی موصوف نے کئی جگہاں غو دورو کیو تاکہ کسے وی طرز غی حفاظتی للکار نال نبڑن غا بہتر انتظام کیا جاسکیں۔ اس دورہ غے دوران موصوف نے فوجی جواناں نال وی خطاب کیو اور تمام دستاں نانہ آپسی تعاون غے نال ہر طرح غی للکار غو سامنو کرن وستے تیار رہن غی ہدایت کی گئی۔ اس دوران موصوف نانہ علاقہ غے اندر موجودہ حفاظتی انتظامات متعلق تفصیلی جانکاری وی فراہم کی گئی۔

WEATHER

جموں کشمیر مانہ محکمہ موسمیات غی پیشن گوئی غے مطابق اج تیں کئی مقامات ور تازہ برف باری تے بارش ہون گا امکان ہیں۔ محکمہ موسمیات نے اج رات تے کل سویرے کئی مقامات ور بارش تے برف ہون غی پیشن گوئی کی ہے۔ اس تیں علاوہ ۱ تے ۲ فروری نانہ وی برف تے بارش ہون غو امکان ہے۔ اس دوران جموں سرینگر قومی شاہراہ ور گڈیاں غی آؤجائی غو سلسلو جاری ہے تے مسافراں نانہ تیار سفر کرن غی تلقین کی گئی ہے۔ اس تیں

علاوہ جموں خطہ نانہہ کشمیر نال جوڑن آلی مُغل سڑک آلیں تک گڈیاں غی آوجائی وستے بند
ہی رکھی گئی ہے۔